

改

亭

詩

集

改亭集卷二

吳江計 東甫草著

男從孫璣全姪嘉禾重校編

七言古

濟南名宦祠中肅拜先從祖大叅公木主感

賦

濟南雄藩冠中國形勢襟喉控南北勝朝德陵丙
丁間我家大叅攝方伯恨當璫餚熏天時天下爭
奉尚公祠東州中丞那免俗經營忧息不敢遲首
名大叅議規制大叅正色目直視寧甘一死忤上
官不忍此身陷泥滓當時死難六君子五人丁未

成進士可憐皆我同年生我今後死誠非是更有
一人生同里首觸權姦魏給事諸公骨碎且不辭
我今拂衣便歸去已拚碧血灑青天幸遭削奪臥
林泉戊辰特起總憲臬剛中不附東林賢從此功
名等秋葉白髮青山愛冰雪傳經獨信後人才諸
叔聲華果英絕愧我蓬飄到歷城遺愛還詢舊日
珉名宦祠中瞻拜切夕陽荒草對空庭

過滄溟先生墓作寄嵇爾遐明府

嵇時謫歷城丞

怪石嵯峨若相觸黑豕紛紛下來牧中有大字滿
碑題下馬摩娑幾迴讀云是滄溟古碑道一片黃

塵蔽春草揮鞭爲驅羣豕開我愛先生意氣好文
人自古相輕薄七子諭交俱不惡同時逸興凌九
煙身後高吟留五嶽我今羈旅歎無朋欲與嵇生
話蕭索嵇生磊落真吾徒長篇汙漫歌嗚嗚微官
大隱歷城下不愧虬髯一丈夫

登白雪樓有懷滄溟兼憶王謝宗徐梁吳諸
公

樓名仍白雪樓趾已非舊四顧悲風來淚落沾衣
袖吁嗟先生崛起大名時幸值天下昇平久列聖
相承振紀綱士氣深醇經術茂文人掞藻闢春華

亦愛廉隅秋實厚五子先後捷南宮白雲曹郎並
攜手雖然標榜互紛紜蔚然王李爲功首只因不
肯附分宜一一風塵麾出守文筆偏工拙宦人富
貴誰能爭不朽吁嗟先生登茲樓意氣傲誕無王
侯光芒直上華不注瀾翻欲竭東海流絕交謝氏
太輕薄甘心獨逐瑯琊遊百餘年來英華竭景陵
東鄉恣謀孽祖謝更有虞山翁瞋目操戈自爲烈
大樽已往舒章死風流實恐成銷歇茲樓剏自施
宣城卽愚山督學歎舊懷賢別有情極望泰山長不見
惟有泉聲日夜鳴

趵突泉

怪哉此泉何從來，參天拔地聲鳴雷。
明珠白璧爭噴激，三穴鼎立凌樓臺。
黃冠指示長太息，茲泉涌竭關國脉。
眼見先朝癸未年，竟歲探源無一滴。
樓上仙人跨鶴歸，樓中金碧對朝暉。
臨高遠聽泉鳴咽，笑指牛山淚濕衣。

濟上喜晤李屺瞻感述一首并呈王貽上
荅文宋牧仲

丙申歲暮我遊宋文康宋公子牧仲結交侯徐皆
賢豪下榻留予意珍重永城練子時亦來衝寒把

酒城南送殷勤示我手一編云是秦中李子新詩
篇老蒼直駕崆峒上才調欲出滄溟先予爲一讀
一失色攬之上馬至京國我友汪大稱能詩見此
咨嗟歎奇特維君戊戌捷南宮新詩俊爽更不同
與汪相見旣極歡並時王氏起山東三子齊名動
燕市忌者反脣側目視予方下第急歸家相逢草
草別君去幾年相思不相見自傷投謁長貧賤廣
陵不受典客呵河間遂避當關面豈知君意屬吾
徒坐失好會違歡謔飄蓬此地得相親促坐披襟
枉故人高吟各有千秋事目下悠悠不足論

梁園讌集觀合肥公卽席賦詩

席布侯仲衡堂中

梁園首夏天氣和高軒冠佩森嵯峨羣賢景附看
吐握侯芭置酒邀經過華燈靜夜清樽列都護紅
兒歌白雪拂柱儂絃繞玉壺垂羅舞縠嬌明月天
下君宗有幾人山高水深疇與論開懷寫意傾座
客膝席爲壽何紛紛先生酒半從容起頃刻煙雲
揮滿紙拜贈人人慄素心滿堂動色皆驚喜杯酒
猶溫數篇畢且吟且飲盡今夕天然秀色出芙蓉
坐使時人求格律忽看曙色照堂東投筆鳴騶古
宋中此地從來盛詞賦意氣誰能擬上公

歌別彭定夫

與君世講誼不薄耐可中懷並蕭索相逢握手但
攢眉何用瞻天空漠漠桐風一夕報新秋我欲北
渡黃河遊君今除喪好讀書人面冷煖無深求君
不見古來公卿將相多孤兒當時蠖伏人誰知人
生墮地要努力遭逢那得無順逆

別徐恭士長歌

我生遂作飢驅者十年兩客平臺下茲遊况值長
夏時錯莫求人汗如瀉感君慷慨獨留余坐君高
堂策君馬君馬白晳高九釐安穩馴習迥不同君

堂虛敞來遠風六月不熱疑江中隱几長吟送永
日雄談亦足開心胸八關甘泉爲予設沉沉啜茗
銷煩渴有時新釀注深杯共坐中庭待明月掞文
摛藻各矜奇應手捶鉤各相悅感君意氣層雲裏
淹留似欲忘羈旅長夏已過清秋來惜別徘徊視
行李我將渡河北入都賣文賣藥授生徒君應早
爲蒼生出棲遲高臥非良圖

別陳上舍送之白下

與子聚首已百日南枝相依自相惜三秋炎蒸往
返難感君惠顧情逾密遊梁詞賦我未成羨君年

少方知名少保家風看未墮對揚賢父隨諸兄君
今八月舊京去莫愁湖畔秋風清伯氏雲霄振六
翻珠盤廣會高才生小弟相從殊不惡箏吹參差
相間作乘風南下闔閭城詩篇磊落誇河嶽唱酬
皆吾同心侶寄語予懷轉蕭索我今北渡漳河流
銅臺荒草悵新秋但得生逢曹吉利深水高山百
不愁

排悶

楓桑蕭蕭吹寒風城柝斷續隨疎鐘月黑轉見明
星密霜黃翻覺高天空心痛遙疑母噉指可憐久

客裘蒙茸家書九月杳不得夢魂夜夜京師中

聞家

中書俱寄

至都下

首春宴集王敬哉先生青絅堂卽事

帝城融雪春風來尚書名客清樽開蟠蟠黃髮獨
下士殷殷吐握真憐才三年一度一求見每見轉
覺丰神健周旋不惜禮數寬名言能使人忘倦養
生詎學長生術漱精服氣喧無益怡神覽鏡息吾
機大藥還丹在胸臆巖巖副相當庭趨奕奕羣龍
繞膝娛孫枝森森又林立玉潤才華人不如尚書
蚤遂懸輿志翛然高蹻煙霞致百城坐擁西府書

等身著作東山寄杜曲花深甲第長迴廊紆徑每
升堂祥徵自下雲中鶴鑿石遙同華子岡卽看令
節當元夕張燈八面玲瓏出錯落懸珠玉樹明冰
雪高瀉晶盤碧簾前素月映春星絳蠟垂輝向紫
清座中弟子誰彭戴後堂絲竹想新聲醉歸泥首
意茫然上林春色競芳妍枯柳獨立陽和外翹首
恩光藉所天

歌贈彭中郎

禹峯先生次子也

愛君風流類河朔相逢握手臨高閣愛君磊落能
賦詩結交並

君家著作不可當中丞篇

翰多光芒生男接武頗老蒼蹋歌飲酒尚書堂五
陵年少莫相笑中原好避彭中郎

古藤歌孫太原祚庭席上作

古藤蜿蟄如虬龍縈煙拂日倚庭中繁英綠條若
霞燦年年老幹嬌春風相公謂息齋太傅朝回多清暇

焚香把卷坐其下有時急管間嬌絲名客飛觴極
歡罷一從高臥去東山高閣平津盡日閒陪碁每
憶花前事埽門誰許共追攀我看舊邸懸卿月後
堂重向淵源說吐握依然芳樹邊卿相風流同一
轍論文稽古持長鬚意氣襟懷誰得如最是拔垣

存諫草至今清論滿扶輿指顧宣麻玉殿頭五雲
深處看鳴騶蒼生會待東山相客醉車茵可復留
宴故少宰胡公谷園卽席歌和胤倩

良辰高會懷疇昔六載之前當此日平津開閣坐
春風爲許升堂賜顏色亭臺杜曲始經營長楊細
柳遙凝碧牆角桃花看半遮疎簾隱几攤書帙心
力空將丘壑成悲纏黃鳥嗟何及只今仲季繼風
流割鮮置醴娛賓客跋履重窺金谷園傷心幾叩
西州策稠花亂蕊艷晴絲曲沼游魚自儔匹對酒
沉吟送夕陽相看意氣無蕭瑟五侯七貴等浮雲

憔悴繁華同瞬息誰能長借魯陽戈永爲蒼生駐
安石諸公酒盞莫教乾聊復爲歡盡今夕座中處
士最深情長吟一篇頭半白

賀宋聲求新婚

花枝照天白日長小屏團扇鴛鴦香玉鏡金蟲隱
盤霧宜男蝶竊窺雲房黃扉公子翩翩出畫眉綠
筆妝臺立飛瓊仙姝十八鬟二十五絲彈錦瑟碧
煙紫鳳雙徘徊麒麟之兒天上來明年此日湯餅
會正見沙堤高築新崔嵬

送子邁遊秦中歌

我師宋中允公子也

遠行忽在暮春日日暖風恬草正腓中原人物西北最函關形勝天下稀計程匝月方卽次詠懷覽古常踟躕官貧那免子負米身去每念親倚闌葵花爛熳蒲酒熟望爾欣欣躍馬歸

率贈永年傅庸菴

自愧學醫二十年上池未飲心茫然與君抵掌談竟日恍若披雲見天出願從受學拜匡牀精思表裏析微芒丈夫生不爲良相肘後方書敢獨藏

投贈吳明府

客秋八月來謁公旬日三晤別匆匆感公待我顏

色腴稱我似與常人殊以此感公意未歇停雲朔
風兼落月一年之中各草草以公之才亦潦倒蛟
龍斗水困威神雕隼臂縲難騰身何況坎壈若我
等俯首風塵獨隱忍思公兩度再求見咫尺相違
難對面負米歸來空兩肩倚闌阿母雙眼穿依人
何處劉荊州伏櫪年年淚暗流以公意氣能得士
何不令我承知遇得士須得國士心報恩自比常
人深結客須結窮途中感恩詎與當時同寒灰且
溺韓安國牛衣病臥王章泣一朝轉轂驚時來致
身日月鞭風雷以公憐才最慨慷向公言懷忘其

狂公如省覽不相許明日一帆五湖去

研瀆草堂歌爲費古心戶部作

憶昔謝玄暉分符守宣城平陵在郡下別墅此經營愛其山水佳自公多娛情至今洗研池千載揚其名安知驚人句不從此池生池水澄泓長不竭池塘闌柳風流歇城市移來况晚唐城外青山復相別謫仙最愛謝詩篇搔首携詩欲問天曾游漂上求遺蹟愛而不見心茫然千年勝地爲人守此地今落費公手誅茅卜築就漣漪依舊池塘與園柳草生禽語自朝朝看竹携藜過石橋攤書永晝

凭欄坐魚樂花飛我亦豪費公磊落真丈夫仙郎
畫省高皇都拂衣暫寄滄洲興趨庭且見來鵠雛
長房華胄矜遐尚勲名會踞宣城上水檻浮槎滌
研歸拄頰吟成肯相讓

宜山堂歌爲溧陽彭廣文作

我來平陵東駕言彭園麓園前列岫作畫屏園後
清泉繞華屋我登平陵城南望彭園樹樹色蒼茫
欲拂雲千年古木神靈聚我登平陵城南望彭園
藤藤身十抱若龍臥蟠曲夭矯相凌嶒平陵人家
多園林彭園名勝甲平陵賤子窺園亦不易我師

顧我常相稱虞山老人有序記再集羣公投贈句
此園行見萬古傳宜山堂中多感遇我聞平陵逼
舊京昔年畿內稱嚴城幸以僻處獲安堵水陸未
致干戈爭名園不隨陵谷改肯堂再睹規模在孝
廉船上擁羣書廣文意氣驚當代愧我風流非謫
仙北湖石■幾洞漩名園嘉樹空相賞琴樽應自
憶彭宣

贈別友人

凝寒太虛高積雪馬蹄蹴踏層冰裂愁看遊子向
南歸北風耳後聲嗚咽通門膠漆重流連豈忍相

逢便離別知公結念在倚間千里遙還志莫奪賤
子蓬蒿苦躰人自慚無物拂征塵京華倘附詞場
末仰藉珠璣喙唾頻

別盧龍孤竹山堂後三松樹

與爾盤桓遂一月天涯相聚非徒然清宵我愛坐
其下長歎時獨觀其巔枝如虬龍方起蟄氣可吞
雲未上天更羨三株成鼎足結根孤竹山堂邊歲
寒蒼蒼守霜雪榦古漠漠交雲煙風塵蓬轉西征
路淚落征衫空自憐

又贈別文起堂前一松

三松旣聳山堂後一松復踞前堂右凌雲不畏孤
生難獨立中庭見深秀半枝枯折已多年生意龍
鱗尚挺然望汝再榮來入夢八州陶侃待登天

羅郎行戲贈弘載

羅郎身長八尺餘兩顚毳毳頗有鬚腰身結束又
穩稱揚鞭顧盼軼我車驟如飛鳥追風疾塵暗青
山忽相失君能下馬卽賦詩料君上馬必殺賊愧
我風流比羊祜從行臥向車中去他時白羽指健
兒未堪一着黃皮袴

六月二十四日我吳相傳爲荷花生日漁陽

道中值此有感而述

荷花今日是生日花蕩爭遊紛如驛先期持錢喚
酒船是日城東聯袂出朱欄碧檻坐逍遙船家少
婦供酒肴青青佛手筵前放洗盞俱換宣成窖鱠
魚剝鱗截方寸燕窩如雪雞尖嫩主人落筋未須
臾狎客低頭噉何健十番鼓歇清歌來嬌絲急管
相徘徊豪家角勝須快意老班三選當塲開隔船
茉莉珠蘭香佳人啼眉墮馬粧推簾時露金跳脫
玉搔頭顫窺波光日暮迴船花影動田田荷葉風
吹送採蓮滿挿酒船頭樽空客散歸同夢家鄉行

樂都如此歲歲年年驕蕩子客裏相思一慨然悲
歌試聽隴頭水

改亭集卷二終

改亭集卷三

吳江計 東甫草著

男從孫寶全 默嘉禾重校編

五言律

渡大河

茫茫是何物眼底一相親擊楫當年志渡江今日
身浮沉看島嶼明滅見城闈但許長風利樓船到
海濱

寶應城外

渡江纔二日希復見青林獨此垂楊色芊綿感客
心三湖連浩淼萬堞起春陰形勝還襟帶雄懷試

一臨

淮陰偶見

牙檣如列雉
蟲蟲滿前川
橫海誰楊僕
防淮想謝玄
陣雲天際合
戍火浪中懸
便欲乘潮去
朝宗到日邊

日暮同子曠望黃河

落日望黃河
驚沙走白波
風塵此終古
游子竟如何
注海東流急
輸漕北極多
勞茲水意客
鬢愧蹉跎

河水至放舟出閘志喜

可喜南河水湯湯果北來舊痕看漸沒新漲欲爭
迴繫纜嗟三日揚船舉一杯凌晨風色好直到馬
陵臺

送春

送春春已去春去始成悲可惜芳菲日多爲行役
時鄉心飛鳥疾別淚故衣知今夜粧樓裏應憐聽
子規

出都次日二首

昨日復今日皇州又涿州到家從此去爲客欲誰
投負米違慈母無車感舊遊勞生真計拙歸夢滿

西疇

柳色年年碧繁花處處紅春光看自好幽恨若爲
空日炙無聊爾天吹不盡風生平遲暮意淚眼任
塵蒙

良鄉道中遇寶應李素臣有贈四首

共
有傷心事相逢各自知河陽悲挂

在素臣時喪愛妾贏

博感魂之

予將卜葬長男淚盡征衣濕堤長度馬遲羈懷

正搖落况值暮春時

旅悶憑誰訴相隨我獨來可憐乘下澤無以及龍
媒草色緣堤淺山光背日開今宵有明月應許共

徘徊

師門同侍坐兄事並別郎

子

御翰傳鶼鶩嵩呼近

鳳凰幾年仍濩落每北輒蒼黃往事深恩在遺弓

未敢忘

之子才華盛蹉跎恨未伸那堪報罷日又作悼亡
人錦瑟調聲歇香蘅乞夢頻三湖空浩蕩莫洗淚
痕新

曉行

拂曙度長垌垂鞭信馬行乳烏啼傍母高岸影疑
城星向何方沒風占此日輕畏人遊子事慎勿厭

晨征

過雄縣

茫茫陸海內此地忽江河似接滹沱脉遙聯易水
波沙明魚鳥樂洲淨柳蒲多遠觸吳儂目思爲破
浪歌

任邱道中迴望西山有感

是日爲新進士臚
賛

不盡西山色今朝極望無帝鄉羅劍佩我舌問妻
孥寂寥隆中嘯蒼茫督亢圖昔賢知未遇時一哭
窮途

呈宋座主

莫報恩知厚將離轉愴神祇因貧到骨空有淚沾巾落月金臺曙飛花濟水春前途迎鶴首重與話

艱辛

白楊

三月交河畔森森見白楊悲風搖曉日倒影泣斜陽似柳難爲折非花不受香齋前如可植我意欲千章

梨花

梨花開白雪碧柳映青袍行色真堪樂天心惜太勞無文慚絳灌能事避蕭曹一櫂東吳去秋江我

亦豪

道傍見落花

飛花滿路偶下馬立踟躕可惜春光盡方爲客路
初小妻驚柳色稚子望家書那更衰親意年年苦
望閭

梁園月夜懷門人吳靄徐鉉

靄字虞升鉉字電發時吳客蘇

臺徐館
吳興

二妙光吾黨思深詩漸工可憐同旅食誰與念塗
窮踪跡殊南北襟期誓始終清宵愁不寐相望月
明中

追哭侯研德宋疇三

侯宋真知我提攜憶酒壚存亡遂異路哀怨獨前途天道勞疑信神仙竟有無友恩慚未報灑淚問遺孤

疇三有一遺孤竟不育研德好神仙之事

初夏從宋座主讌集陳孝廉園林四首

首夏好風日追陪几杖宜名園羅珍木華屋艷雲楣客擬南皮集樽從北海移陶陶堪永晝行樂望吾師

碧水方塘靜緣堤柳帶長游魚知在藻鳴鳥愛如簧乘興踰層嶺微醺坐曲廊從來戀丘壑對此意

難忘

高閣一登臨荒荒旅思侵雲低淚眼樹天近望鄉
心瓦屋山難見北湖亭正陰

李白遊溧陽有宴北湖亭望瓦屋山詩

當年李供奉亦似此行吟

愛客陳驚坐情文足勸酬中厨和芍藥豐膳比青
邱日落女牆暮風生水面秋籃輿相挽去步屢幾
淹留

七月十四日潁州坐月

清潁城頭月流光應到吳鄉心千里外旅夢百端
俱隻影難論劖空庭且據梧遙憐倚闌者起坐念

兒扶

夢芝翁夜過

問誰騎馬客踏月叩門來耆舊知通德蕭疎見旅懷夜深茶竈息話久柝聲催浸得甘瓜在爲翁當酒杯

城頭同門人劉凡作

讀倦且拋書從游步屢徐城頭頻悵望野色一蕭疎寒葉黃將遍殘霞錦不如我懷何所寄只此叟長裾

九月十三日月下偕劉凡輩作

高秋新霽後天地淨無塵靜夜懸明月清光照幾人從容同翰墨卓犖共精神我與二三子深懷難具陳

次原韻奉酬徐文學

係大司馬張公鶴鳴甥劉公勇考功友也句中

之故及

自從遊頽後久已識君名況復談皆妙真令客盡驚劉惔推舊德張翰許新英慎勿分南北烏衣半是傖

徐詩自謙云誠哉北地傖予謂王謝過江時皆傖也

制義原無味何須論淺深君才徒博物吾道在明心密洗虛空象誠求寂寞音考亭傳正學迷者未

能尋

九日同人集公定齋中次韻

家居同載酒何事尚嫌貧看爾題叢菊令予歎旅人微霜隨葉落涼月照簾勻每恨登高日鄉關望來真

九月十三夜月下坐文昌閣傍寄張孟深

閣影似浮圖城隅倚碧湖秋風動衰柳夜月起殘浦幽賞宜清坐良宵誰共娛伊人看咫尺我愛執

金吾

孟深舊爲錦衣指揮

九月十八日夜雨有作示門人劉凡劉昂劉

志豈志岑

一燈秋夜急並坐苦吟時句向深思得才從靜夜
知空堂寒襆被疎影動花枝時坐側菊花數本辛苦看君
輩妻然客淚滋

送子端至兗州省親

寒氣滿郊村君行始出門客心驚歲晏子職爲冬
溫北道冰霜早東州禮樂尊歸來聽新句樽酒夜
重論

庚戌除夕

守歲繁龍家春風感絳紗講能通四子書或愛三

車積雪占年瑞初陽兆物華倚闌負慈母慚恨滿天涯

送張州倅二首

張於國初有功頴州今爲僧白門

落日秋風暖遙林煙靄稀幽人住郊寺羈旅欲何依草昧需才吏清時乘鐵衣昔年轉戰處今日着緇歸

舊是棠陰地謳吟在頴人三車聞白法一笠挂閒身到日梅初放歸時菊又新涼風空滿袖何以渡

江濱

塗中清明日遣悶二首

上已過邗溝清明渡泗州風花隨地有啼笑總離愁柳厭他鄉碧山憐故國幽登樓焉敢賦何處得依劉

纍纍青草塚上塚值清明鬼眼無新舊天時愴死生難將三釜粟莫奠五侯鰣瞻父悲生事窮途淚更盈

慰繆天自

時天自罹父艱欲歸未得

負米來燕市逢君喜可知那堪把臂日強半撫膺時各有慈親在須寬游子悲人生雖半百努力未嫌遲

發都門將之盧龍二首

烈日煦神州因人關塞遊黃塵迷大路皂帽雜鳴
騶膽怯偏乘馬魂驚恍墜樓勞生真計拙歸思滿
西疇

徐行三十里回首見斜陽漸喜炎威減差令客夢
涼月絃看未滿蛙鼓聽何長隱隱疑城堞前迎蠟
炬光

通州城外二首

通州城外水浩蕩似吳天北走千章木口外採木俱集此
南通萬斛船投鞭聊自哂騁目一翛然今日初勝

騎多慚使節憐

邊風當五月節候近清和穗結麥花了一籬成梁燕
多鄉心寄櫻筍幽恨結漁蓑莫漫求禪喜

時同友談禪

滹沱汎易訛

乘車

遂有升車樂都忘控馬勞寬心客睡穩濡輶亂流
高遠岫參差見晴沙轉側牢同遊相顧笑逸興是

吾曹

偶作寄妾

我履汝所製履穿憶汝頻剪刀出清曉纖手動初

春客路三千里離愁十二旬

予以二月十五日出門至六月望百二十日

矣遼西今夜月應照夢中人

將自盧龍至宣府曉起有作

月落盧龍塞風吹孤竹雲客懷方寂寞人語已紛紜無寐疑天曙嚴裝警夜分濤聲松際落謾謾又

誰聞

七月朔臥病宣鎮城中二首

時墜馬次日

寒雨蕭蕭下空囊欹枕聽身因一跌誤腸逐九迴停棄物安時命空文寄醉醒南華頻在眼鴻翼想

冥冥

俄然七月朔客路歷三時甘旨人誰寄酸辛我自知鍊金須繞指學佛只低眉力疾清晨坐愁深淚似絲

七夕二首

時在宣府官舍

客中逢此日未有不思家况在邊城遠兼悲秋氣
賒黃羊侑蘆酒白鳥就燈花爛熳求酣睡何心聽
暮笳

去年今夕好久客乍歸來流水池塘靜匡牀枕簟
開老親可脫粟小婦進香醅微醉携纖手雙星看
一迴

七月初八夜聽雨邊城有作寄內

雨聲斷復續夜聽轉婁淒時序知秋水泥塗怯馬
蹄酒醒心事集燈暗旅魂低何日巴山句長吟和

老妻

義山巴山雨夜詩老妻最愛誦之故爲落句

宣府逢立秋

是歲閏七月

秋氣吾所愛邊城太早寒披裘三伏慣擁絮五更
殘風自長城落天連大漠寬摩霄羨鷹隼健翻爾
盤桓

新秋同弘載子重陪王公夜話

秋風驟相入已覺紙窓宜對酒燒龍腦論詩坐鹿

皮宦情公澹蕩客况我棲遲起共空庭立邊山落
月時

不寐

人對南窓臥風嫌北道涼醒來抱明月夢去見空
牀百日家書斷三秋旅夜長南飛有烏鵲羨爾渡
河梁

彈琴峽

有小序

居庸關北二十里羣峰環合林木蔽虧怪石
嶙峋泉聲清澈下有彈琴峽上有賞音臺余
從王公發漁陽至上谷憩此有詩

四山圍繞處千里一泉來奇石聲相激清言鬱不
開似琴彈變徵穿峽起鳴雷賞識高軒意臨流首
重迴

過雞鳴山沿桑乾河畔馬上作二首

千峰開兩岸中挾小黃河名有桑欽識源因博望
多波鳴輸駭浪沙激起盤渦邊馬憑高聽人今喚
奈何

勝地多相似龍門記昔遊一樓倚萬佛四水合雙
流伊洛瀍澗合流於龍門石壁刻萬佛于庚戌夏曾游處浩浩長無極茫茫
對此愁河源來最遠臨望亦銷憂

昌平城南作

茨菇葉已密，杭稻花方齊。
如歸故山裏，一啟家園扉。
京東水田熟，河北流民歸。
賑恤豈長策，惄然念皇畿。

北歸

塞上日易暮，淒然我北歸。
山深女蘿瘦，草茂橐駝肥。
土銼聞人語，沙蟲點客衣。
生來骨相薄，只合老漁磯。

冬夜月下光祿卿席上作四首

最喜嚴寒候，今宵氣似春。
疾風吹漸息，明月坐相

親依幙清光滿窺檐淑景新卿雲方澹蕩尊酒召

門人

話久初聞斥香凝未放梅鑄顏欣密意立雪愧凡才耳熟三蕉葉心添一寸灰郎君看吐鳳想見重

徘徊

時子散在坐

橘柚來何處垂垂滿曲房攜燈頻向樹對酒忽思鄉蠟照攤書架冰融點筆牀自誇今入室幸忝舊

升堂

詩句師真好清新庾不如細論知格律得意在蕭疎醡擘姑蘇酒烹嘗寶坻魚教思兼賜食寸草愧

踟蹰

癸丑元日杜門旅館二首

裏足過元日
支頤對一編
敢將真棄物
出溷好新年
淡淡青陽屆
荒荒白日懸
探春花縱好
底急向人妍

蝶旣迷莊子
鞭宜讓祖生
年華雖屢換
頑鈍總無驚
息影空庭闌
依賢旅緒清
小人有母在
不敢負平生

讀邢州詩有懷集中張

舜王

崔

鳴鶯

趙

培基

諸同年兼悼鉅鹿楊猶楚先生

同年推四子門下溯楊公丁酉座主曹公出楊公門好句雄河
朔高懷並岱宗相思清夜月獨聽老槐風何日從文讌南皮勝事同

別邢州國士書院後大槐

我來槐樹下忽已見新秋久客忘時序依人慎去
留燈移燒蝎尾月出喘吳牛明日辭襄國空堂國
士愁

郭氏園亭沙隨同人讌集

郭時爲元氏令

倦遊當暑日最喜濯清泉水檻移高宴浮槎蕩遠
烟炎威雨後減賓戲醉中傳爲念陶彭澤能忘種

林田

八月十五夜廣平院中讌集主人口吟杜詩
夔州十五至十七四首予因每夕次韻和
之

客傾楚國醴主佩呂虔刀並坐嘉林下遲看明月
高輪孤開一照星衆失如毛子夜疑天曙詩成欲
吮毫

歸夢趨吳會蓬心客趙城已愁秋夜永况對月華
明忍淚燈宜滅隨人酒共傾蟪蛄啼不住掩耳避

營營

十六夜翫月

爽氣欣今夕孤懷信九秋誰將清夜月一照濁漳
流叢桂思招隱高天欲寄愁故鄉無限好蕩影刺
輕舟

十七夜待月

黃昏空悵望倚徙愧閒身稍見光移樹方知月趁
人衣裳憎客久稅稻憶家頻不寐聽風起沉沉雨
又新

奉東申鳬盟兼寄觀仲隨叔二首

廣平月夜作

斯人堪結想宛在此城中夜靜高齋月秋清喬木

風道心堅益澹詩法老逾工十載驚寥濶余類
轉蓬

當代論人物三申洵偉人阿兄真獨立兩弟喜能

振二語出梁園先生結隣集忠孝承貽燕文章得雅馴茲遊難

會面良讌憶京塵

謂辛丑春同集梁園也

冬至前一日重發天雄至京師是夕宿魏縣

二首

已近河南路南行路已千

京師至天雄凡一千里

如何驪北

去歲暮入幽燕生理依人慣窮愁逐境遷可堪今

夜月又向魏州圓

暝色平原合寒林四望齊升車騁遠目出郭上長
堤局戶經時久斜陽乍見低不知天地內何處是
雞棲

魏縣夜行

寒月光千里沉沉信夜行驚烏飛復定枯樹影交
橫牛曳車輪緩城孤刁斗清此時懷越石起舞見
平生

曲周道中

茅束平橋軟扶輿愼一登晶晶橫匹練皚皚積層
冰天月光同皎霜林氣共凝夜行五十里孤戍見

微燈

發曲周縣

忽喜見行舟城西橋下頭津門從此逝漳滏同
流水勢如環轉城西得曲周川原看信美嘉樹坐
淹留

過邱縣境

縣屬山東由曲周至威縣道經處也

行行畿輔久今日忽山東白草迷荒徑黃塵起暮
風肥磽宜地脈聚散信農功水骨乘寒月玲瓏極

望同

夜過廣宗

列炬隱林紅遙知近廣宗識塗從老馬夾轂走村
農短晷須長夜輕寒感大冬連宵倦行役睡美失
晨鐘

威縣車中見月哭龔芝麓先生四首

車中見明月車下立徘徊盡日行三輔頻年賦八
哀西州門未叩南斗望空迴白馬何時會千人慟
哭來

身賤雖通謁心知重有師君宗人已沒捐棄竟安
之月下深杯酒花前信手詩誰知成永訣執绋獨
予遲

獨坐頻垂涕風塵更愴神此身何所託吾道失斯人趙壹慙窮鳥莊周恨涸鱗龍門今亦有喟獨感公真

長物嗟無有孤情真可哀高天知震悼薄海共悲摧祕器東園賜生芻北道來成都桑八百尚愧有餘財

月下懷朱六

茂闢時聞在廣州

朱家久不見聞在五羊城庾嶺梅花早裴谿杜若生朱隱裴谿卽唐相裴休故宅君行逾南邁我役再東征萬里何曾隔相思咫尺情

夜入南宮縣界擬寄鄭司直提學宋中郎大

令

兩公皆予同年

人馬影參差車中月上時寒光雖澹蕩萬靄尚迷
離周道平如掌鋒車去若馳恒山今在望鄭宋若
相思

冀州詠所見

侍中光四面不待坐生香帽側蟬雙葉風吹錦襪
襦期門挾彈俊擁項弄兒狂爭似東方騎年年大
綬黃

蠡縣道中

人家牆北角殘雪尚稜稜日氣溫雖偏寒颺敵未能浮圖棲凍雀睥睨立豪鷹漢縣蠡吾地千秋感廢興

安州道中

棗樹多如齊村煙土銓生兒童知拱立蕃漢雜深耕麥隱西疇拙天隣北極清行行望京國炙曝寸心明

御城寺二首

距安州三十里嘉靖初建有甘泉先生碑文

乾鵲巢高樹祇園出舊林到門齊下馬選佛一徵心候吏提壺倦行厨啜茗深摩碑看歲月嘉靖到

於今

碑是甘泉筆文章助冥搜從來卑象教無異觸浮
漚野馬吹龍樹斜陽動鹿裘我生雖浩蕩結念在
西疇

過清苑有懷同門樊天木

時爲楚中應城令

燕臺分手日荆郢憶君時真氣今何用清心可自
持歲寒姜被重日暮祖鞭遲疇昔同門友音書久
不知

過安肅城外擬寄梁明府

惠我青絲履難酬金錯刀因嘗安肅菜却憶廣陵

濤

梁舊
江都

寧
舊識

從王縉

謂阮
亭

新知

李翹
謂

瞻

謂
屹美

名勝輦下親切五雲高

前詩方就屹瞻與梁明府並馬而至

我在輕車坐君乘快馬迎相逢幾不識一語足平
生日落揮戈急城深乞火明翩翩李供奉相並見
交情

夜入容城

容城彈丸地囊括足風流後有楊忠愍前聞劉靜
修燃薪傳一夜驅馬挾雙輶可惜荒祠在樞衣我
末由

又詠椒山先生

先生楊仲芳吾道得光芒事實存年譜文章滿樞
牀簫韶遺器定苑洛受書詳一疏千猜忌如何引
二王

固安道中寄京師董三弟方南

高暉近 帝畿卽次解征衣苒苒看殘臘欣欣似
遠歸琴書隨寓穩睂眼傍人稀何日偕吾弟清言
慰愁饑

近京

日落浮雲聚冰融漲水痕近京多大澤抱郭有諸

屯隱隱西山見明明北斗尊凌晨行百里便可入
都門

旅夜不寐成二首

城柝聲將歇晨鐘聲漸聞可憐近長樂只是蔽浮
雲去矣人宜賤歸哉志不羣幾時有餘粟養母更
論文

母老猶論績兒衰懶著書遠遊難卽返身廢竟何
如永夜思天曙晨寒望日舒幾年羈旅淚未灑向
牛衣

雨雪遲虞升不至兼示電發

衝泥良晤隔念子又新年涕淚供兒女

虞升客冬長子子

月失

一愛女艱難索酒錢雪隨春雨後燈亂晚風前何

日偕徐邈高言共一韻

改亭集卷三終